



Universitad da Genevra creescha ina mesa piazza da rumantsch

Clau Solèr è tscherni sco docent

■ (cp) **A partir da quest semester porscha l'Universitad da Genevra puspè mintg'emna quatter uras da rumantsch.**

1994 avev'ins reduci a chaschun d'ina vacanza la piazza da l'incumbensà d'instrucziun ord motivs da spargn e qua tras offert be mintga quindesch dis mintgamai 4 uras per l'incumbensà da curs.

L'instrucziun rumantscha ha ina fitg lunga tradiziun a Genevra. Entschet hai 1919 cun lecziuns privatas d'Anton Velleman. 1932 ha la Facultad creà ina sedia extraordinaria per A. Velleman. Suenter han blers enconuschents Rumantschs instrui a Genevra, numnadamain, Reto R. Bezzola, Leza Uffer, Ricarda Liver, Iso Camartin, Chasper Pult, Clau Solèr e Gunhild Hoyer.

Il dumber da studentas e students è adina creschi ed ils davos onns frequentan enturn 15 students regulars da duas annadas ed intginas auditoras ed auditurs libers ils differents curs. Mintga onn fineschan plirs lur studi rumantsch cun l'examen final per il

segund rom, 1998 eri 4 persunas, quest onn 8 persunas.

Pervi da quest svilup legraivel ed en vista d'ina purschida pli cumpletta èsi reussi al responsabel da persvader la facultad d'augmentar l'offerta rumantscha a quatter uras per emna.

A partir da l'emprim d'october 1999 è Clau Solèr ch'è dapi 1986 a Genevra sco incumbensà da curs, elegì per 50% sco docent e docescha mintg'emna quatter uras.

Vasta purschida

Il studi da rumantsch pretenda dus onns da studi che tut ils students frequentan ensemen. I vegn purschì mintg'onn in auter program, uschia ch'ils students survegnan ina vasta survista da la litteratura, lingua e cultura rumantscha. In'ura è deditgada a l'emprendissadi da rumantsch. Ina lecziun d'ina ura tracta il lexicon rumantsch ed en las duas uras da litteratura tracta il docent ils dus prosatur rumantschs Cla Biert e Gian Fontana.